



REPLIQUE A LA RESPONCE QUE

les Fortins & autres. accusez ont fait au Factum
du sieur de Launay Gravé.

p. 22



V S S I-tost que les accusez ont veu que l'on se preparoit à mettre le procez sur le Bureau, ils se sont efforcez à prevenir l'horreur que feroient naistre leurs crimes par quantité de memoires & de Factums, dont ils ont creu que les premieres impressions, les discours artificieux, & les suppositions hardies ne laisseroient point de place à la verité; & comme si le procez se devoit iuger sur le dire des parties, ils ont estimé que debians vne defense preparée avec toutes ses figures, elle meriteroit quelque creance, & *affirmationem sumeret ex homine quod non habet ex veritate.*

Mais l'euenement a fait voir que le mensonge n'a plus de force ny de parole quand la verité commence à paroistre, car ayans entrepris de respondre au Factum dudit sieur de Launay où la suite du procez est naïfvement descrite, ils sont pour la pluspart demeurez tout court, & pressez de leur conscience, pressez de la cognoissance que la Chambre commence à prendre du procez, ils ont fait de si mauuaises responses qu'elles feront aduoüer par tout, ce que disoit Papinian quand il ayma mieux mourir que de faire vne Apologie pour vn parricide, *Qu'il est bien plus mal-aisé d'excuser le crime que de le commettre.*

- I. Ils recognoissent d'abord que si les crimes sont veritables ils ne peuuent trouuer de supplices assez rigoureux, ils demandent que l'on mesure à la mesme proportion la peine de la calomnie: Et bien que le sieur de Launay n'ait point esté leur accusateur, mais Monsieur le Procureur du Roy à la requeste duquel le procez ait esté instruit, & la verité qui s'est denoncée d'elle mesme à la religion de la Chambre & au procedé de Monsieur le Commissaire, neâtmoins c'est le seul aduantage que le sieur de Launay demande contre eux, qu'on les iuge par leur suffrage, & qu'il n'y aye point de grace pour ceux que la Chambre trouuera certainement coupables.
- II. Mais pour iuger ce que l'on doit croire de leur iustification, ils ont osé dernier que Iacqueline Fortin fust leur parente, quoy qu'il fust aisé de iustifier par toute la Prouince de Normandie qu'elle estoit leur tante, & bien qu'elle ait esté condamnée entre-autres supplices à auoir la teste tranchée, La Noblesse dont les Fortins se vantent, n'est pas si certaine que Monsieur de Paris estant en Normandie n'eust imposé Ferriere à la taille; mais il n'est pas question de leur Noblesse que le sieur de Launay ne leur veut point contredire, puisqu'elle ne sert qu'à rendre les taches plus visibles & les crimes plus enormes: Et pour leur fortune, il est impossible d'en iuger, si on ne veut croire ce qu'ils en disent eux mesmes; & quelle foy y doit-on adiouster, puis qu'ils ont la hardiesse de dire, que Bachelot n'est point faussaire apres l'Arrest qui est produit, que Guymarcheres n'est point concussionnaire apres vne infinité de

A



preuues, que Beaupré n'est point faux monnoyeur apres la confederation qu'il a eu avec Menainuille.

III.

Car il ne faut qu'employer tout ce qu'il dit contre Menainuille & sa femme pour le condamner, puis que Menainuille ayant esté son Greffier quand il estoit Vicomte de Mortaing, il faut presumer que c'est là où il a fait l'apprentissage de toutes ces meschancetez; Mais au moins ne peut-on desnier, qu'il ait eu avec ledit Menainuille vne confederation tres-estroite & vn commerce continu, puis qu'il recognoist qu'il est debiteur de Menainuille d'une somme de sept mil liures, qui est mesmes entre les meschans la plus grande marque d'intelligence & d'amitié.

Et si Menainuille a fait la denonciation contre Beaupré par vn acte particulier, peut-on dire que ce soit à dessein de le calomnier, puis qu'au contraire vne denonciation particuliere ne se peut iamais faire qu'en faueur de l'accusé, pour tenir la chose secrette & luy donner moyen d'accommodement; Car pour l'accusateur, sa descharge est plus grande & la calomnie moins suspecte par vne denonciation publique, car la denonciation particuliere pouuant estre perduë, le sieur de Montauron la pouuant supprimer, Menainuille perdoit l'effect de la grace & de l'abolition; Et ainsi que l'on fasse passer Menainuille pour tres-meschant, Beaupré n'en sera que plus coupable, puis que on ne peut pas douter que ce qu'il a fait en cette occasion, ait esté pour faire plaisir à Beaupré, & par consequent à sa priere comme il la deposé.

Et pour confirmer cette verité, Beaupré a-il iamais demandé la suppression de cette denonciation? A-il demandé reparation contre Menainuille; Ne s'est-il pas contenté d'en assoupir la poursuite; Ne s'est-il pas contenté de negotier aupres du sieur de Montauron, le fruiët & l'execution du Testament de Leuesque; Ne s'est-il pas interessé dans les negotiations qui ont esté pratiquées, tant enuers le sieur de Launay, qu'enuers le sieur du Tertre Barré; N'a-il pas sollicité Guimarchere, d'instruire le procez aux autres prisonniers, comme il auoit fait à Leuesque, ainsi qu'il se iustifie par les Lettres de Guimarcheres, qui luy en fait des excuses, comme au premier autheur & au principal interessé de toute cette affaire, ne l'a on pas veu pendant longtemps agissant & sollicitant tout seul; Et seroit-ce de la façon qu'auroit agy vn homme d'honneur, offensé par vne denonciation secrette; Auroit-il rien eu de plus sensible & de plus present, que de poursuiure la iustification de la calomnie, ou la reparation de l'offence: Et la seule dissimulation auroit peu passer pour vne confession du crime. Et le seul moyen dont on s'est seruy, ayant esté le Testament de Leuesque, qui peut douter qu'il ait esté fabriqué pour cet effect, & pour pratiquer l'impunité à vn homme qui ne voyoit point d'autre issue.

Et quant à ce qu'on dit que le procez de Leuesque estant commencé au parauant la denonciation de Menainuille, cela seroit inutile, puis que le Testament est depuis, & qu'il ne seroit pas imaginable que l'on se fust seruy d'un procez commencé pour faire vn Testament faux, mais puis-que la denonciation a esté constamment anti-dattée de six mois, c'est en cela qu'on recognoist certainement l'artifice & le crime de Beaupré, puis que ce ne peut estre que pour son aduantage seul qu'on ait fait cette fausseté, qui est à present si constante qu'on n'a presque pas la hardiesse de la desnier, mais qui fait vne conuiction indubitable de toutes les autres.

Et par ce que cette denonciation doit estre la clef de l'ouurage tout entier, comme s'en est la premiere piece, il importe de faire recognoistre qu'elle

conuainq la fausseté de tout le procez, non seulement par presumption & par conjecture, (par ce qu'il est impossible de croire que d'un procez dont la denonciation est fausse l'instruction soit veritable) mais par vne demonstration euidente & vne consequence necessaire: Car premierement la denonciation estant fausse, la deposition de Besnier qui est du mesme iour l'est aussi par necessité, ou pour mieux dire ces deux Pieces iustifient la fausseté l'une de l'autre, car comme Iacob a reconnu qu'il n'auoit esté attiré à faire la denonciation qu'au mois de Iuillet 1640. comme ceste verité est confirmée par la confession de son pere, par tous ceux qui l'ont veu aller en denonciation, par le sieur de Vezins qui l'y a mené; Besnier demeurant d'accord aussi qu'il n'a esté ouy qu'au mois de Iuillet, ces deux confessions se confirment l'une l'autre, non seulement par la ressemblance & la conformité qui ne se rencontrent volontiers que dans les discours veritables, mais par ce que la denonciation de Iacob estant fausse & antidattée, il faut de necessité que la deposition de Besnier soit pareillement fausse, puis qu'elle doit estre posterieure, & la deposition de Besnier estant fausse & dattée du 7. Decembre 1639. Il faut que la denonciation de Iacob le soit pareillement, puis qu'elle n'a esté faite qu'au mois de Iuillet mil six cens quarante.

Les conclusions du Procureur du Roy iustifient aussi la fausseté de la denonciation & de l'audition de Besnier, par ce qu'elle n'y est point comprise, & la fausseté de ces conclusions est iustificée par le decret dans lequel l'information du 7. Decembre est mentionnée, & la fausseté de ce decret ne peut pas estre reuouquée en doute, puis qu'il fait mention d'une information qui n'a esté faite qu'au mois de Iuillet ensuiuant, par le mesme moyen se iustifie la fausseté de l'information du 13. Iuin, puis qu'il n'y a pas d'apparence, qu'elle ait precedé la denonciation & la premiere information, & se iustificiant encor par la confession de Iouault, qui reconnoist ne l'auoir signée que depuis le deceds, la fausseté du reste du procez par la signature du Breton qui constamment ny estoit point present, par la marque de Leuesque qui n'en fist iamais, & la fausseté du Testament par la confession de Vennier, par la signature de Bachelot qui constamment estoit absent, par les diuerses copies qui en ont esté baillées.

- IV. V. & VIII. Apres cela il est estonnant que les accusez osent se qualifier innocens, mais il est bien plus estrange que pour dire que Pinot est vn faux tefmoin, Procureur ordinaire du sieur de Launay, ils ayent osé suposer qu'il estoit le seul tefmoin de la duplicité du testament, & que ce soit vn leurre duquel le sieur de Launay se soit seruy, pour piper Terre-Barré de cent pistolles, pour luy faire accroire qu'il estoit faux-monnoyeur, & pour luy couper la bourse, Et quoy que le courage & la fortune du sieur de Launay soiét fort exempts de ce soupçon, quoy que ce soient des choses bien contraires, de dire au mesme temps qu'il a fait vne fourbe pour attraper cent pistolles, & qu'il a fait des despences infinies pour corrompre trois cens tefmoins, on pourroit excuser que des personnes pressées de l'horreur de leurs crimes & de la crainte d'une punition presente, se seruissent de toute sorte d'inuentions pour donner couleur à leur deffense, si la verité contraire n'estoit point trop certainement iustificée, mais que Pinot ait iamais esté Procureur du sieur de Launay, cela est faux, & on n'en rapporte pas vn acte, mais bien est-il iustifié par escrit, que Pinot est Procureur ordinaire de Ferrieres, que depuis qu'on s'est plaint à la Chambre de la duplicité du testament, depuis qu'on a allegué pour preuue l'extrait qui en auoit esté donné à Pinot; Ferriere a esleu son

domicile en sa maison, & de quel front peut on appeller faux tefmoin, vn homme dont on a fuiuy la foy, mefme depuis qu'elle a esté engagée dans vne verité qui leur pouuoit faire preiudice, & encore si ce que Pinot depofe n'estoit point verifié d'ailleurs; Mais quand le Vicôre de Mortaing est venu en ceste ville, n'a-il pas parlé du Terre-Barré & des autres circonftances du premier testamēt? fuffit-il de respondre que ce qu'on dit du Vicôre de Mortaing n'est pas veritable, quand il se trouue iustificié par plusieurs tefmoins, & par des lettres escrites à son instigation, toutes les conferences qui ont esté faites avec les parens & les amis du Terre-Barré ne iustifient elles pas qu'il y estoit trop veritablement compris: Giroult sieur de la Corbliniere qui a esté l'un des Iuges du Procez, ne depofe-il pas tout ce qui s'est passé entre Pinot & Bachelot: & l'extraict du testament, n'est-ce pas celuy que Bachelot a donné à Pinot, & dans cet extraict Terre Baré n'est-il pas nommé: & Bachelot tout meschant qu'il est, a-il osé dire que ce fust Pinot ou le sieur de Launay qui luy eussent fait mettre Terre Barré, qui luy eussent fait mettre l'achapt de la ville aux Oyseaux & les autres circonftances qui ne se rencontrent point dans le second; & quand on dit que c'estoit vne illusion d'un coupable trop curieux, ne demeure-on pas d'accord, que dans cet extraict le sieur de Launay ny Pinot par son ordre n'ont contribué que la curiosité seule, curiosité iuste & loüable a vn homme d'honneur, dont la reputation est sensible, mais estant veritable que ça esté Bachelot, qui a deliuré cet extraict du testament par l'entremise du sieur de la Corbliniere, qui tous deux tefmoinoient vouloir satisfaire le sieur de Launay, la seule questiō qui reste n'est que de sçauoir, s'il est possible d'imaginer que Bachelot ait inuenté des faits qui n'estoient point dans le testament, qu'il y ait compris des personnes qui luy estoient incognues, ou qu'il ait donné l'extraict du testament tel qu'il estoit, & il ne faudroit que le sens commun pour iuger cette verité, si elle n'estoit point esclaircie par la deposition de Iustel, de Pinot & de la Corbliniere, qui certifient qu'en baillant cet extraict il auoit le testament entre les mains, par les negotiations avec le Terre-Barré, par les voyages qu'on a faits aupres du sieur de Miniac, pour sçauoir en quelle monnoye la ville aux Oyseaux auoit esté payée, par les discours du sieur de Montauron, & par le premier interrogatoire qui a esté fait au sieur de Launay sur ses memoires, dans lequel ayant esté précisément interrogé, s'il n'auoit pas payé en faulfe monnoye la terre de la ville aux Oyseaux, il s'estonne que les accusez n'ayent eu encore l'effronterie de dire que ç'ait esté luy qui se soit fait interroger sur ce fait pour eluder tous les autres, dont il estoit chargé par le second testament.

VI. VII
IX. &
X. Et s'estant si bien iustificié de tous les faicts qui sont mentionnez tant au premier qu'au second, il est estrange que ces personnes desesperées ne puissent abandonner la liberté de le calomnier, mais c'est vn extreme aueuglement de l'entreprendre sans fondement & sur de si miserables pretextes, car ils sont obligez de demeurer d'accord, que de tous les articles du premier & second testament la fausleté est iustificée, & quand le sieur de Launay en a marqué les circonftances, tant pour l'acquisition de la ville aux Oiseaux, de la monnoye de Nantes, de sa demeure dans saint Malo, de sa qualité, ils demeurent muets & sans response, & sur toutes ces veritez ils n'ont trouué à subtiliser que sur le nom de Cassier, qu'ils ont dit estre vne condition & non pas vn nom; & bien que cela soit cōtraire au testament qui dit vn vallet nommé Cassier, qu'on le prenne comme on voudra, par nom ou par condition, l'un & l'autre sont esgalement faux, puis qu'il est iustificié que dans ce temps, le

sieur de Launay n'auoir aucun valet, aucun Cassier, mais seulement Perrine Bouyn à S. Malo.

Et toute l'accusation contre le sieur de Launay estant reduite à ce mauuais equiuoque, n'est-ce pas vne effronterie de dire, que le sieur de Launay apprehendoit d'estre compris en vn procez des Tarquelins, accusez d'auoir desrobé vne croix de cuiure dans l'Eglise d'un village, n'estoit ce point pour luy que s'estoit fait ce larcin, n'est-ce pas vne meschanceté insigne de dire que l'on apprehendoit que les Tarquelins chargeassent la femme de Leuesque, & que la femme de Leuesque chargeast le sieur de Launay, que pour cét effect on ait demandé des deffences à la Chambre, corrompu le Geollier, fauorisé l'eusion des prisonniers, & que pour la faire coupable, on allegue la contrariété de ce qu'elle a dit deuât Monsieur Dudit, & deuât Monsieur de Villahier qui ne l'a point interrogée, car il est bien vray que le sieur de Launay a eu vne apprehension tres-iuste, que Beaupré & les Officiers de Mortaing, qui auoient desia supposé vn faux testamēt à Leuesque, fissent encore mourir de mesme la femme & les Tarquelins & leur supposassent des testamens: Et pour cognoistre si ceste apprehension estoit iuste, il ne faut que voir ce qui s'est passé, car lors que les Officiers de Mortaing ont veu qu'il s'estoit pourueu à la Chambre, ils ont pris pretexte de la contagion pour les faire sortir des prisons, & en cét endroict le sieur de Launay recognoist, que leur hardiesse s'est enflée, de ce qu'il auoit obmis la meilleure partie des fraudes qu'ils ont commises dans l'eusion des prisonniers, de ce qu'ils ont presumé qu'elles demeureroient incogneuës, car il s'estoit contenté de marquer l'auuglement des Officiers de Mortaing, lesquels apres en auoir dressé procez verbal ont eu la hardiesse d'accuser le sieur de Launay d'en auoir procuré l'eusion, Mais par ce qu'ils veulent que l'on deueloppe leur malice toute entiere, il ne faut que voir le procez verbal que le Lieutenant general a fait de l'eusion des prisonniers, dans lequel il se void que le Geollier s'est plaint, que les prisonniers faisoient effort de sortir à cause de la contagion, que le Iuge s'y transporta, & qu'il vit plusieurs personnes qu'il nomme, qui s'estoient euadez, & deux qui estoient enferrez qu'il ne nomme point, & sans s'estre mis en deuoir de faire reintegrer les prisonniers ny d'assembler les autres qui estoient encore dans les fers, il se contente d'enjoindre au Geollier de se tenir enfermé pour la crainte de la contagion, & nonobstant ce procez verbal, on a voulu supposer que c'estoit le sieur de Launay qui auoit forcé les prisons pour faire euader les Prud'hommes dits Tarquelins & la femme de Leuesque, qui estoient ceux que l'on a dit par le procez verbal auoir trouué enferrez & que l'on n'a point nommez, comme s'il estoit possible d'imaginer que le sieur de Launay eust faict ouurir les prisons pour sauuer les prud'hommes, qu'on eust fait sauuer tous les autres, & qu'on eust laissé ceux là enferrez, & qu'on eust aduertiy le Iuge de Mortaing pour luy donner la liberté de les arrester s'il eust voulu, & c'est pourquoy dans vn procez ou tout est faux, il ne faut point doubter que ce procez verbal soit pareillement faux, attendu l'affectation de ne point nommer les Tarquelins, attendu les termes ambigus dont on s'est seruy pour permettre au Geollier de laisser sortir les prisonniers sans le dire expressément, & pour concilier ce procez verbal avec deux choses directement contraires qui sont arriuées en suite, dont l'une est que d'abord les Officiers de Mortaing ont publié par tout que les prisons estoient infectées de peste, & ont mesmes instruit vne cōtestation pour les faire aërier, l'autre que par vn nouveau conseil ils ont voulu rendre le

sieur de Launay coupable de ceste euasion, mais pour monstrier l'impudence & l'enormité de ceste calomnie il ne faut qu'observer trois choses.

La premiere sont les lettres que Guymarchere escrit à Beaupré, sur la presse que Beaupré luy faisoit d'acheuer le procez à ses prisonniers dont Guymarcheres s'excuse, par ce qu'il n'y auoit pas de seureté de les aborder à cause de la maladie, mais qu'il scauoit bien où ils estoient, & qu'il les reprendroit quand il voudroit.

La deuxiesme est la Requête qui a esté présentée par le sieur de Launay à Monsieur Duduit estant sur les lieux, par laquelle il luy a remonstré que les Tarquelins estoient dans leurs maisons, qu'on le vouloit malicieusement rendre coupable de leur euasion, qu'il n'y auoit point de iustification meilleure que de descouurir où ils estoient, & de les faire reprendre, c'estoit la premiere chose que deuoit faire Monsieur Duduit voire mesmes quand personne ne l'eust requis, & neantmoins, fauorisant le dessein des Officiers de Mortaing qui vouloient feindre vn crime sur l'euasion qu'ils auoient eux mesmes procurée de personnes qui estoient à leur porte, il ordonna simplement sur la Requête qu'elle seroit mise au sac pour en iugeant, & apres cette diligence de la part du sieur de Launay, apres cette Ordonnance iniuste & absurde s'il y en eust iamais, de quel front ose on l'accuser d'auoir fauorisé l'euasion de personnes qu'il a offert de faire reprendre & qui l'auroient esté sur le champ, si Monsieur Duduit ne l'auoit point refusé, si les Officiers de Mortaing ne l'auoient point empesché.

Mais ils n'auoient garde de se comporter plus fidellement en cette rencontre, qu'ils ont fait dans l'emprisonnement d'un nommé le Seneschal, lequel estant sorty des prisons de leur consentement, ils firent croire que c'estoit un nommé Ioüane qui auoit fauorisé son euasion, & le firent constituer prisonnier, le Curé de Mouline beaufrere de Ioüane ayant poursuiuy sa liberation, d'abord on luy demanda de l'argent, depuis on luy proposa que s'il vouloit reprendre & reintegrer Seneschal on donneroit la liberté à son frere, il semist en deuoir de ce faire, on luy donna pour assistant un nommé Cherancé valet de Bachelot, assisté de Gilles Pelchat, Iulien Seneschal & Iean Bessnier, qui estoient toutes personnes dont on s'est seruy en ce faux procez, à l'assistance desquels Cherancé ayant fait sauuer Seneschal, le Curé de Mouline s'en est plaint, Cherancé a esté constitué prisonnier, conduit d'Auranches à Mortaing, où on la laissé euader sans en auoir fait aucune diligence ny poursuite, Ce qui fait voir que toutes les poursuites que l'on a faites de temps en temps contre les vns & contre les autres, n'ont pas eu d'autre dessein que la concussion & l'exaction, & que selon l'interest & la satisfaction que les Officiers de Mortaing y ont rencontrée, ils ont pris ou lasché ces personnes, que si on les eust laissé faire, ils n'auroient pas manqué de faire plusieurs executions, plusieurs testamens semblables à celui de Leuesque, mais quand ils ont veu que cela ne leur réussissoit pas, ils ont lasché les prisonniers de peur que ce fussent autant de tesmoins contre eux pour la conuiction de leurs fourbes.

Et bien que le sieur de Launay n'ait point besoin de s'enquerir si toutes ces personnes accusées estoient coupables ou non, neantmoins il demanderoit volontiers surquoy ils ont constitué, surquoy ils ont tenuë la femme de Leuesque prisonniere, puis que comme Ferrieres confesse, il est constant qu'il n'y eut iamais la moindre charge contre elle, puis qu'encor à present ils ne l'accusent que d'auoir varié dans les interrogatoires qu'elle a prestées deuant

M^r Duduyt & deuant M^r de Villahier qui ne la point interrogée, car outre que c'est vne malice intigne, de dissimuler qu'elle a premierement esté interrogée deuant M^r le Grand, deuant lequel elle a dit toutes les mesmes choses que l'on pretend qu'elles a dites depuis deuant M^r de Villahier, outre que ce sont deux choses contraires de dire que le sieur de Launay auoit fait euader la femme de Leuesque, & qu'elle auoit au mesme temps déposé deuant M^r Duduyt quelque chose qui luy pouuoit faire prejudice, ledit sieur de Launay estime que la Chambre n'aura pas grande peine à iuger lequel est le plus croyable, ou les interrogatoires faits deuant M^r le Grand & M^r de Villahier, ou la procedure de M^r Duduyt, puis que sans exagerer toutes les choses qui en pourroient diminuer la foy, il est constant qu'il s'est rendu partisan des accusez, constant qu'encor qu'il n'eust qu'une Commission pour informer, il a pris la liberté d'arrester le sieur de Launay sans charge & de mettre son Valet en prison, Et enfin ce qui ne peut pas estre pris pour vne simple faute, il a commis les Officiers de Mortaing pour instruire le procez au prejudice de l'Arrest de la Chambre qui leur en auoit interdit la cognoissance, & apres que M^r Duduyt, apres que les Officiers de Mortaing, apres que Beaupré ont fait tout ce qui leur a esté possible pour rendre le sieur de Launay coupable; Ne faut-il pas auoir perdu toute sorte de pudeur, pour dire que Beaupré ne s'est iamais meslé du procez, ques'il auoit voulu nommer vn homme qui a fait de la fausse monnoye pour le sieur de Launay il auroit rabaislé son orgueil, ques'il y a eu des monitions publiées on est prest de s'inscrire en faux, qu'on n'a point informé à charge contre le sieur de Launay, car toute la Chambre ne sçait elle pas que Beaupré en a tousiours esté le solliciteur, M^r le Procureur du Roy n'a-il pas certifié en pleine Audiance qu'il luy auoit communiqué les faits qui ont esté fournis en consequence de l'Arrest du mois de Feurier, qu'il a receu tous les memoires que Beaupré luy a voulu fournir, soit pour l'accusation du sieur de Launay, soit pour la deffense des Officiers de Mortaing, & seroit-il possible de croire, qu'ayant fait vn Testament faux pour accuser le sieur de Launay, Beaupré & les Officiers de Mortaing eussent obmis à articuler des veritez, quand il a esté question de sauuer leur honneur & leur vie, qui eussent esté en pleine feureté & toutes leurs faussetez couuertes s'il s'estoit trouué la moindre preuue contre le sieur de Launay, qu'ayans preuue depuis dix huit mois l'estat auquel ils sont à present, ils eussent attendu qu'ils fussent dans les prisons, & à la veille du supplice, pour dire qu'ils sont innocens, par ce que le sieur de Launay est coupable, sans en alleguer autre preuue sinon que Beaupré, cet esprit plein d'inuentions & de fourbes, dit qu'il cognoist vn homme sans le nommer qui a fait de la fausse monnoye pour le sieur de Launay, comme s'il se retenoit de le nommer pour pardonner à sa reputation au mesme temps qu'il l'accuse de fausse monnoye, de corruption & de sacrilege, dont le sieur de Launay ne sçauroit souhaiter de meilleure & de plus aduantageuse iustificacion, qu'en ce que les personnes qui l'en accusent par passion & par nécessité n'en sçauroient alleguer la moindre circonstance.

Et comment voudroient-ils qu'on eust informé à charge contre vne personne, contre lequel tous les artifices ont esté inutiles, contre lequel encor à present leur malice ne peut rien inuenter, & comment ose-on dire qu'on s'inscrira en faux contre des monitions publiées à la Requeste de Monsieur le Procureur du Roy, dont on rapporte les publications, oseroit-on desnier que le Commis du sieur de Montauron ait fait entendre tous les tesmoins

qu'eux mesmes luy ont nommez par des billets qui sont au procez, Et enfin que voudroient-ils que l'on iustificast, puis qu'encor à present ils n'articulent rien, Et on ne croira pas qu'ils eussent pardonné des veritez s'ils en eussent peu trouver la preuve, puis qu'ils n'espargnent pas des injures gratuites, impertinentes & destituées, qui ne seruiroient qu'à aggraver leur punition, si elle n'estoit au dessus de toutes ces nouvelles calomnies & des peines ordinaires de la Iustice.

xi. & xii. Et bien qu'il suffit au sieur de Launay d'avoir iustifié son innocence par la bouche mesme de ses parties, par la contradiction de leur malice & de leur impuissance, de leur clameur & de leur silence, bien que tous les autres faits qui concernent le procez de Leuesque, ne le touchent qu'autant qu'un homme d'honneur indignement offensé, peut avoir d'intérêt que sa réparation soit exemplaire, autant que tous les hommes de bien doivent souhaiter, que les meschantes actions soient punies, bien que l'instruction n'ait point esté faite à sa Requête, mais à la poursuite du Procureur du Roy & de l'Office de Monsieur le Commissaire, neantmoins par ce qu'il en espere la réparation il est obligé d'en esclaircir la conviction toute entiere.

Et premierement pour la folie de Leuesque, d'accuser d'imposture toute la procedure qui la iustifie, de dire qu'on a choisi dās les Parroisses des Gueux, des Mandians pour les corrompre plus facilement, & leur faire déposer de ce faict inuenté, qu'il falloit prendre par les rolles les plus solubles & les plus apparens, qu'il se fust trouvé quatre cens personnes qui eussent déposé le contraire, ce sont des objections ridicules, car quand il n'y auroit que des payfans qui déposeroient de la folie de Leuesque, le grand nombre des tescmoins qui en ont parlé mettroit ceste verité hors de toute sorte de soupçon, & les quatre cens personnes par lesquelles on pretend que l'on pouvoit iustifier la verité contraire, sont demeurez dans l'imagination des accusez, car ils ont bien fait tout ce qui leur a esté possible pour avoir des attestations que Leuesque n'estoit point insensé, les lettres pressantes que Guymarcheres & Bachelot en ont escrites au sieur de Vezins le iustifier assez, mais il est estrange que dans un pays où ils avoient toute sorte de pouvoir tant que leur crime ne leur a point rendu tout le monde ennemy, ils n'ayent peu trouver aucun tescmoignage à leur advantage, & s'ils en ont tiré, comme l'on dit qu'ils ont eu quelques attestations, elles sont en telle forme qu'ils ne les ont iusques à present osé faire paroistre, c'est à dire qu'elles portent sans doute la marque de la supposition.

Mais outre les tescmoins qui ont esté ouys sur les lieux, par ce qu'ils avoient plus d'habitude avec Leuesque, y ayant quantité d'autres tescmoins qui déposent de sa folie, des Capitaines, des Gentils-hommes, quels autres tescmoins peut-on desirer pour une preuve constante, & puis qu'on s'est estudié de répondre à tous les faits, pourquoy a-on dissimulé la deposition du sieur Marquis de Bressé confronté à Guimarcheres qui luy a fait advoüer qu'en sa presence Leuesque avoit esté fouëtté comme fol & insensé, & cette verité qui conuainc non seulement la folie de Leuesque, mais la science de Guymarchere qui a instruit le procez, ne vaut-elle pas autant que cent tescmoins, & ny trouvant point de réponse, peut-on faire croire que si le sieur de Bressé a dit vray comme on a esté obligé d'en demeurer d'accord, comme on ne l'ose contredire, peut-on accuser de faux tescmoignage cent personnes qui ont déposé la mesme verité.

xiii. Et par ce que la seule iustification des accusez sur la folie de Leuesque a esté iusques à present le nombre des Iuges qui ont assisté au iugemēt, lesquels on dit

qu'il n'est pas vray semblable qu'on n'ait peu engager dans la cōdamnation d'un homme insensé, les accusez sont obligez de demeurer d'accord, qu'encore que cela ne soit pas ordinaire, il n'est pas neantmoins impossible, ils sont obligez de reconnoître que les Iuges d'Andely qui sont de la mesme Prouince, ont esté cōvaincus d'auoir fait mourir des innocens; & on a raison de dire que l'espece n'estoit pas pareille, car dans l'affaire d'Andely il y auoit vn homme veritablement assassiné, les accusez raisonnablement soupçonnez estans ariuez à la ville à l'instant du meurtre, mais par ce que l'on vist trop de chaleur & de violence dans la confection du procez, par ce qu'il se iustifie que des cahiers de recusation auoient esté changez, on iugea les Officiers d'Andely coupables d'auoir aduancé la condamnation & empesché l'esclaircissement de l'innocence qui fut par apres iustificée; mais dās cette action il n'y a aucune partie qui ne soit pleine de faulseté, d'injustice & de meschanceté, & s'il estoit vray qu'on n'eut point accoustumé d'interroger sur la sellette en Normandie, cela ne pourroit seruir qu'à excuser les autres Iuges, à dire qu'ils n'ont point cogneu la folie de l'accusé, qu'ils ont esté trompez, que ceux qui les ont surpris en sont infinimēt plus coupables, *& quoties manifestum est aliquem periisse sine causa, vt calumniantibus irascaris ignoscendum est iis qui decepti sunt.*

Et quand à ce qu'on dit que Leuesque a esté ouy en ses deffenses lors du iugement du procez, cela est contraire à ce que tous les accusez ont dit eux mesmes qu'il auoit esté seulement present lors du iugement, qu'il estoit à genoux & qu'il n'auoit rien dit; mais quand la Chambre verra qu'il n'est pas vray ce que l'on suppose qu'on n'ayt point accoustumé en Normandie d'ouyr les accusez lors du iugement, elle iugera qu'en cette rencontre l'obmission n'en a peu estre faite qu'à dessein, ou pour tromper ceux qui ne contribuoient point dans la fourbe, ou pour excuser ceux qui y contribuoient, & en fin si l'on considere que par tout le procez de Leuesque il n'y auoit point de charge suffisante pour le condamner, comment presumera on que contre la folie prouuée de Leuesque, on puisse opposer la religion des Iuges qui l'ont condamné, & comment les croira-on quand ils disent qu'il n'estoit point insensé, quand ils reconnoissent qu'ils ne s'en sont point esclairs par son interrogatoire, quand on verra qu'ils ont esté assez faciles ou assez meschans pour le condamner iniustement, pour ne pas considerer son innocence, ou pour ne la pas cognoître.

XIII. Mais c'est la plus mauuaise de toutes les defenses, de se defendre par la vray-semblance & par la qualité des personnes, quand on ne peut iustifier les actions; & de fait à l'égard du Curé de Mortaing, on dit que c'est vn sacrilege de diffamer vn Prestre aagé de cinquante ans, Bachelier en Theologie, & choisi par Monsieur de Monthelon, Mais on ne prend pas garde que le sieur de Launay ne dit contre luy que ce qui est iustificié par escrit & par sa propre confession: Car n'est-il pas constant que ce n'est point luy qui a accoustumé d'assister les coupables au supplice; n'est-il pas constant que le billet escrit de sa main où l'on a mis vne fausse marque de Leuesque a esté reconnuë par luy, mais qu'il a esté contraint d'aduouer que Leuesque n'auoit point marqué. Et sur tout cela les Officiers de Mortaing demeurans sans responce, le sieur de Launay leur demande si le Curé de Mortaing est vn homme de bien ou vn meschant. S'il est homme de bien comme ils disent, le plus grand aduantage qu'ils en sçauoient tirer, est de dire que Leuesque en mourant n'auoit point fait d'action de folie, & il ne seroit pas extraordinaire qu'un homme insensé eust des interuales lucides, que dans la presence & l'apprehension de la mort la licence de son esprit & ses extrauagances fussent arrestées, que Dieu mesme qui permet quelquefois que les plus noires meschancetez arriuent à leur fin, que des veritez importantes

demeurent pour vn temps dans l'obscurité, pour receuoir par apres vn chassiment exemplaire, eust permis que cét homme mourant ne fust point d'extravagance, afin que le sacrifice en fust acheué & la meschanceté consommée, ils sont conuaincus par sa bouche de la fausseté de la marque, & par consequent de la fausseté du testament & de la fausseté du procez. Si au contraire ils disent que c'est vn meschant qui les a chargez de cette fausseté, pourquoy veulent-ils que l'on croye ce qu'il a dit de l'assistance qu'il a rendue à Leuesque lors de son execution, qui n'est pas pourtant de bien grande consequence? Et pourueu que par le mesme tesmoignage les accusez demeurent d'accord qu'ils sont des faussaires, & que la marque de Leuesque est supposée, il n'y aura pas beaucoup à deliberer de la consequence que l'on peut tirer du reste de sa deposition, & c'est vn auuglement estrange de prendre tant de peine à recommander la probité d'un homme par la bouche duquel ils sont condamnez, puis qu'ils sont par elle conuaincus d'une fausseté qui rend toutes les autres necessaires.

xv. xvi. Mais il ne faut pas dire que ce soit vn auuglement, mais il faut dire au contraire que c'est la confusion miserable de ces personnes qui perissent, & qui cherchent pour leur salut ce qui sert à aduancer leur perte: Car se peut-il rien voir de plus pitoyable que ce qu'ils disent sur la qualité du denonciateur & la fausseté de la denonciation.

Ils disent que le denonciateur est suffisamment aagé, où ont-ils appris qu'on receust pour denonciateur vn enfant & vn valet qui n'a rien vaillant? Est-ce vne bonne iustification de dire que Beaupré ne l'a jamais veu, puis qu'on sçait bien que ce n'est pas luy qui a agy par sa personne, mais qui a fait agir Guymarcheres son cousin? Et peut-on douter que ç'ait esté luy qui ait pratiqué ce denonciateur apres la lettre qui en a esté escrite au sieur de Vezins. Et quand on dit que par l'ordonnance la denonciation n'est point necessaire, n'est-ce pas descouurir combien ce procez est faux, combien l'intention de cette denonciation est meschante; Car si pour faire vne denonciation qui n'estoit point necessaire on a constamment fait vne fausseté, que peut-on iuger du reste du procez? Mais puisque la denonciation n'estoit point necessaire, est-il possible de croire qu'on ayt fait vne fausseté sans besoin, & cela estant contraire au sens commun, il est indubitable que la denonciation fausse a eu sa fin, & elle n'en peut auoir eu d'autre imaginable que de la rendre precedente à la denonciation de Beaupré. Et quand on dit que le sieur de Vezins chargé par le testament & le denonciateur son valet, ne sont pas receuables à l'informer, la Chambre iugera si c'est parler François, si ce n'est pas vn coq à l'asne & vne euasion: Car il n'est pas question de sçauoir si la denonciation est bonne, s'il la faut confirmer ou infirmer, mais de sçauoir si elle est antidattée, c'est à cela, c'est à la confession du denonciateur & de son pere, du sieur de Vezins & de tous les tesmoins qu'il faut respondre, & non point disputer si par l'ordonnance vne denonciation est necessaire. Et quand pour repousser le tesmoignage du sieur de Vezins on dit qu'il a esté chargé par le testament de Leuesque, est-il possible qu'on n'ait pas reconnu que les accusez confessent par là que ce procez & ce testament ne sont qu'une friponnerie: Car on pretend que le septième Decembre 1639. le sieur de Vezins a fait denoncer Leuesque par son valet, on pretend que Leuesque en Aoust 1640. l'a chargé de l'auoir depuis trois mois mandé dans sa maison pour faire de la fausse monnoye. Et puisque par le testament le sieur de Vezins estoit chargé, pourquoy ne l'a-on point poursuiuy? pourquoy depuis Guymarcheres & Bachelot se sont-ils adressez à luy pour auoir vne attestation que Leuesque n'estoit point insensé? cela ne fait-il pas bien voir que cette accusation à l'égard du sieur de Vezins, n'estoit qu'une precaution pour preuenir le tesmoignage qu'il pou-

uoit rendre de la verité, comme dans le testament on a compris Besnier & les autres tefmoins qu'on auoit engagez dans les fourbes & les faussetez du procez.

Et quand on dit que le sieur de Launay a tenu le denonciateur six semaines lors qu'il la enuoyé prisonnier de Normandie, pendant qu'il estoit à la sollicitation du procez, est-il possible que l'on croye que la chambre oublie ce que les Officiers de Mortaing passent sous silence, que le denonciateur a esté trouué dans la maison de leur beau frere, où il estoit recelé au mesme temps qu'ils accusoient le sieur de Launay de l'auoir tué, cōme ils l'accusent apresent d'auoir fait faire de la fausse monnoye par des personnes à qui on ne peut trouuer de nom.

Les accusez ne se peuuent pas mieux defendre de la fausseté de l'information du treiziesme Iuin que Iouault à confessé auoir signée depuis le deceds, & du reste du procez, dont la fausseté est conuaincuë, tant par l'absence de Breton, que par tous les tefmoins qui deposent n'auoir iamais veu Breton dans toute l'instruction.

Car de dire simplement que Iouault est vn faux tefmoin, & que les Iuges sont plus croyables dans l'affirmation de leur innocence que luy dans la confession de son crime, outre qu'entre plusieurs accusez, il est indubitable que l'on croid plus a vn qui confesse qu'a cent qui nyent, & particulièrement dans vn crime capital, dans lequel il ne peut iamais estre presumé qu'un homme se mette gratuitement en peril pour perdre les autres, mesmes quand il n'y a point de marques d'animosité precedente; La confession dudit Iouault n'est pas toute seule, puis qu'on demeure d'accord, que Dauid, Charruel & Vannier dont on ne parle point, confessent encore la fausseté de ce qu'on leur a fait faire, & tant s'en faut que l'on puisse dire que la confession de ces personnes soit moins croyable que la deffence des autres, qu'au contraire elle est toute seule capable de faire vne pleine preuve contre eux, & trois accusez qui confessent sont capables de faire le procez à cent qui desnient, mais particulièrement quand leur confession est assistée d'autre pieces conuainquantes, comme l'on n'en peut douter en cette rencontre, car outre l'absence de Breton, qui ne peut pas s'estre absenté pour la crainte des mauuais traitemens imaginaires supposez par les accusez, puisqu'il est absent dès l'heure qu'on a decreté, & tous les tefmoins qui ont esté ouys dans les informations des Iuges de Mortaing, & qui font par consequent pleine foy contre eux, ont reconnu que dans leur audition iamais ny Iouault ny Breton n'ont esté presens, mais ou le Iuge seul, ou Bachelot seul ou tous deux ensemble: Mais que peut-on desirer apres la confession mesmes des accusez, lesquels forcez d'en demeurer d'accord sont reduits à dire que cela se pratique en toute la France, que le Iuge travaille sans son Greffier, Mais cela est bon pour des fausfares, pour des Iuges qui ne treuuent ny ordonnance ny regle, mais d'auoir fait escrire vn Greffier, & d'en auoir fait signer vn autre qui n'y fust iamais ny veu ny trouué en l'audition d'un seul tefmoin, cela ne peut passer que pour vne fausseté monstrueuse & signalée.

Et c'est vne bien foible deffence de dire, que les tefmoins n'ont pas desaduoué d'auoir esté ouys, recolez & confrontez, car outre qu'il ne se faut pas estonner s'ils n'ont pas voulu recognoistre toute la fausseté dans laquelle on leur a fait prendre part, ce seroit grand pitié si tous les tefmoins du procez n'auoient iamais esté ouys: Mais puis qu'ils l'ont esté, pourquoy a-on fait signer leur deposition par vn autre Greffier que celui qui les a entendus? Pourquoy a-on adiousté des marques que Leuesque ne fist iamais? Pourquoy a-on antidatté la denonciation & la deposition? Et apres toutes ces faussetez peut-on doubter de celle qui est confessée? peut-on douter de la fausseté de ce qu'on a fait faire à Iouault & à Breton qui le confessent, l'un par sa bouche, & l'autre par sa fuite?

xviii Et quant apres cela il se trouueroit charge suffisante pour auoir fait mourir Leuesque, ce ne seroit pas vn grand auantage aux accusez d'auoir peu dōner couleur à sa

couleur à sa condamnation par vn si grand nombre de faussetez & d'impostures, & par la deposition de sept ou huit Payfans qu'ils tenoient en leurs fers, mais autant que le sieur de Launay peut auoir de cognoissance du procez, par la reputation publique, il a eu aduis qu'il n'y a point de charge du tout, & qu'il n'y a point de Iuges qui eussent prononcé la moindre condamnation afflictive contre vn homme bien sensé, sur les charges par lesquelles on a sacrifié vn pauvre gueux, vn vagabond & insensé.

XIX. Mais tout son interest estant de faire voir que le testament est faux, comment en peut-on doubter apres ce que les accusez recognoissent eux mesmes, car le testament se trouuant escrit de la main de Vannier, signé neantmoins de Bachelot comme Greffier, ils se sont trouuez dans vne extreme perplexité, de quelle façon ils en parleroient; de dire que Bachelot estoit present cela est contraire au sens commun puis qu'il n'a point escrit, de dire qu'il estoit absent c'est aduoüer la fausseté d'un acte si important, & pour trouuer vne euasion dans ces difficultez, on dit que Bachelot n'estoit qu'à quatre pieds du Criminel & qu'il pouuoit entendre tout ce qu'il disoit, mais comment cela se peut-il concilier avec ce que Bachelot a confessé luy mesme, qu'il estoit dans vn autre lieu que celui ou le testament fust receu, comment cela se peut-il concilier avec ce que Vannier declare, qu'encore qu'il ait escrit le testament il ne l'a point ouy, & seroit-il possible que Bachelot qui deuoit seruir de Greffier n'ait point escrit le testament & fust neantmoins plus proche du criminel que celui qui l'a escrit.

Et quand à la fausseté principale qui se rencontre dans le testament par la marque supposée de Leuesque, les accusez disent que la verité des marques despend de ceux qui les ont veu faire, & non point des experts qui peuuent bien parler de l'écriture & non point de l'ignorance d'ecrire, il y a sans doute bien plus de malice que d'ignorance dans ceste inepte subtilité, car si les experts ont quelque art, quelque cognoissance pour distinguer la forme de l'écriture, pour descouurir ce qui a esté escrit d'une main pesante, ou d'une main hardie, d'un homme qui est en santé ou d'un homme qui est malade, il y a beaucoup plus de facilité de recognoistre ce qui est fait par vn homme qui sçait ou qui ne sçait point escrire; Et dans toute sorte d'actes s'il est mal-aisé de distinguer ce qui est fait ou imité dans les regles ou l'experience de l'art, il n'y a iamais de peine à discerner si celui qui a fait quelque chose auoit experience de l'art où s'il n'en auoit point du tout, & particulièrement dans l'écriture, non seulement les Experts, mais toute sorte de personnes peuuent iuger si les marques sont d'un homme qui sçait escrire ou qui n'en a point de cognoissance du tout.

Mais qu'est-il besoin de chercher dans les presomptions vne verité si certainement establie, & si l'on dit que Daud & Charuel sont en peril pour auoir par l'autorité des Iuges de Morraing & par la crainte de l'oppression signé vn bail dont ils confessent la fausseté, que ne doiuent point apprehender des personnes qui en ont fait dans ce procès autant qu'il y a de pieces, mais de presumer que du Bail, ny du testament, ny des autres pieces ou sont les marques de Leuesque la verité puisse iamais subsister, n'est-ce pas vne temerité insupportable, puisque la fausseté en est conuaincüe, non pas seulement par la confession de Daud & de Charuel, mais par la declaration du Curé de Mortaing que l'on veut faire passer pour vn homme d'exemple, & par le tesmoignage duquel il est neantmoins constant que la marque du Billet escrit de sa main a esté faite depuis le deceds de Leuesque: Or qui a fait ceste marque a fait toutes les autres, & par consequent elles sont toutes supposées.

xx. Il n'est pas besoin de repeter tout ce qui a desja esté remarqué touchant la duplicité du testament, le sieur de Launay ne sçait pas si dans le procez criminel il est parlé précisément de huit cens mil liures, mais il sçait bien qu'il y a preuve, que Beaupré se transportant à saint Malo pour traicter avec le Tertre Barré, pour attirer s'il eust esté possible le sieur de Launay dans le mesme traicté, se van-
toit hautement qu'il en auroit cinquante mil liures à sa part, que Ferrieres en pretendoit trente-mil quand il a accordé avec le sieur de Chaudronnaye; Et le Vicomte de Mortaing ayant poursuiuy auprès du sieur de Montauron vne commission à Guymarcheres pour faire faire le procez à tous les faux-monnoyeurs mentionnez dans cetestament, il est bien certain que dans la composition premiere qui en a esté faite on auoit mis vn grand nombre de personnes; & cette grande recherche pour laquelle on demandoit vne commission expresse, n'eust eu garde de se terminer en la personne du sieur de Launay Graué, & de dix ou douze personnes de neant qui se trouuent dans le dernier testament.

xxi. Mais comment peut-on douter de cette duplicité, puisque les accusez sont conuaincus par leur procedure mesme sur laquelle ils se trouuent reduits à vne si pitoyable defense; car ils recognoissent que sur le testament ils ont decreté contre Tesnieres fils, qui ne s'y trouue point compris, ils auoient eu cy-deuant la hardiesse de dire que ce decret estoit interuenu sur des infotmations par lesquelles Tesnieres fils estoit chargé, à present ils sont obligez de recognoistre que c'est vne imposture, ils disent qu'il estoit chargé par vn procez qui est es mains d'un homme fugitif. Si l'on doit croire ce discours, ils ont grand tort qu'ils n'en ont articulé d'autres plus aduantageux sur la mesme garentie, ils sont si aueuglez de dire que Tesnieres fils a esté chargé par vn tescmoin ouy deuant Monsieur de Villeahier, comme si vne information faite en Novembre 1641. pouuoit donner fondement à vn decret du mois d'Aoust 1640. Et en fin, ne sçachans plus que dire, ils demandent au sieur de Launay s'il y a interest, & il est bien certain qu'il n'en peut auoir dans l'innocence d'un homme qui luy est absolument incognu. Mais peuuent-ils douter qu'il en ayt de faire recognoistre par leur procedure, mesme le changement & la supposition d'un testament, par lequel il est interessé de poursuiure la satisfaction de son honneur & la vengeance de cette meschanceté.

xxii. Il ne croit pas auoir besoin de se iustifier de ce que l'on suppose qu'il a fait offrir de l'argent par Pinot, & connoissant la vie des Iuges de Mortaing par tout le procez, & par les concussions qui ont esté faites sur les denomez au testament pour des choses modiques, & avec vne lascheté informe, on ne presumera iamais qu'ils eussent refusé de l'argent, quand il n'y auroit point de preuve qu'ils en ont demandé. Mais pour monstrier combien cette imposture est insolente, il ne faut que voir l'interrogatoire de Ferrieres, pour sçauoir s'il a luy-mesme soustenu que Pinot luy eust offert de l'argent de la part du sieur de Launay: Il ne faut que voir celuy de Guymarcheres pour reconnoistre s'il a eu la hardiesse d'auancer la mesme supposition, & si au contraire il n'est pas demeuré d'accord d'auoir proposé qu'il se transporterait en tel lieu que le sieur de Launay voudroit pour composer cette affaire, & le seul pretexte par lequel il s'est defendu a esté de dire, que ce qu'il en faisoit estoit pour l'attirer & pour executer son decret.

Et pour ce qui est des Tarquelins outre que l'on a fait voir de quelle part peut proceder leur euasion, c'est vn fait ridicule de dire, qu'il eust fallu beaucoup d'argent à des personnes pour prendre vne resolution pour leur salut & les faire absenter s'ils estoient coupables, & on n'auroit garde de l'aduancer si hardiment qu'ils ont promis de ne plus paroistre, si on ne sçauoit qu'ils sont

decedez, puis qu'on ne les à jamais voulu reprendre quand on la peu faire.

xxiii. Le sieur de Launay estimoit que la seule difficulté du procez, seroit de des-
xxiv. couvrir la part qui a veritablement pris Beaupré qui en est le seul auteur, par ce qu'il a eu l'adresse de se servir du ministère des autres en travaillant à s'absoudre par leur crime, mais de la façon qui s'est deffendu c'est vne chose de-formais indubitable, que la condamnation des autres enveloppe la sienne, qu'il n'y a rien à separer dās cette cause commune, comme la Chambre peut estre memoratiue qu'en plaidant l'appel de Beaupré on prit ouvertement le fait & la deffense des Officiers de Mortaing; Dans cette réponse qui n'est intitulée que des Officiers de Mortaing, on deffend Beaupré plus que tous les autres accusez comme le chef de la conspiration & de la cabale, mais quoy que son crime soit plus couvert sa deffense n'en est pas meilleure, & le sieur de Launay ne sçait pas ce que l'on veut dire, quand on s'assure que le sieur de Montauron ne dira pas ce qu'on allegue contre Beaupré, car le sieur de Montauron ne peut pas desnier que Menainville & sa femme ayent fait des denonciations entre ses mains apres les avoir présentées à la Chambre.

Il ne peut pas desnier que depuis le mois de Juin 1640. il n'a point fait de poursuite contre Beaupré.

Il n'en peut pas rendre d'autre raison que le Testament, puis que c'est le seul commerce que Beaupré a eu avec luy, puis que ses Commis ont publié hautement que si le Testament estoit faux, il falloit que Beaupré fust taxé.

Il ne peut pas desnier que Beaupré ne luy ait mis entre les mains des Lettres de Guimarcheres, par lesquelles il s'excusoit de ne pouvoir continuer la poursuite puis qu'il les a représentées à la Chambre, & à quelle fin ces Lettres d'excuse à Beaupré, à quelle fin mises entre les mains de Montauron, si Beaupré n'avoit besoin que de son innocence seule, s'il n'avoit point de part au Testament de Leuesque, mais comment seroit-il possible que Beaupré fust innocent de la fausse monnoye & du Testament de Leuesque, apres la lettre de son frere, à laquelle il est estrange qu'on ose donner vne si inepte & si pitoyable interpretation.

Il n'est pas besoin de remarquer que dans le fait que l'on a composé pour ce sujet, on articule deux faits qui sont faux, l'un que le sieur de la Chaudronnaye est parét du sieur de Launay, l'autre que les prisons de Rēnes luy appartiennent, mais pour ne s'attacher qu'aux choses necessaires, n'est-ce pas vne illusion de dire, que sur la poursuite d'une debte civile Ferrieres escriuoit qu'il ne vouloit pas que sa vie & son honneur fussent en proye pour les interets de son frere, a-il si peu d'honneur qu'il le creut perdre en souffrant vne contrainte pour son frere, & outre que ces termes pressans font assez cognoistre qu'il ne parloit point d'une debte civile, mais d'une affaire où il y alloit de l'honneur & de la vie, il ne faut point d'autre interpretation à cette lettre que le temps où elle a esté surprise, ç'a esté le lendemain que Ferrieres fust arresté par l'exempt de la commission en vertu du decret de Monsieur de Villahier, & lors Ferrieres estoit en pleine liberté à l'égard du sieur de la Chaudronnaye, il avoit traité avec luy, & partant il faut avoir perdu le sens pour croire que l'on puisse appliquer à vne affaire appaisée, ces termes pressans & douloureux qui ne pouvoient convenir qu'à l'apprehension presente, & Beaupré auroit eu bien meilleure grace de dire de son frere, aussi bien que des autres accusez que c'est vn faux tesmoin, puis que cette lettre porte la conuiction & de Beaupré en particulier, & de tous les autres en general, car si le procedé des Juges de Mortaing a esté iuste, si le testament est veritable,

quel interest y auoit Beaupré; Et disant que Beaupré y auoit interest qu'on auoit mis pour son subiect sa vie & son honneur en peril, n'est ce pas aduouer ouuertement l'iniustice dont on luy demande la garantie.

Mais Beaupré veut-il contre luy vn autre tesmoin que luy-mesme, car s'il n'estoit point interessé dans le testament, pourquoy les voyages à saint Malo, & toutes les autres negotiations qui se sont adressées à sa personne; Aussi demeure-il bien d'accord que ce faict est conuinquant, & pour s'en defendre, il dit qu'il alloit traicter vn mariage avec la Dame de Nermont, parente du sieur de Launay, qui est vne double supposition; car outre qu'elle est soeur de la Legue, ennemy capital du sieur de Launay, il y a preuue dans le procez qu'il estoit à saint Malo pour traicter l'affaire du testament de Leuesque: Et si son voyage auoit esté si innocent, Desbuttes son vassal & son complice n'auroit eu garde de s'engager dans toutes les variations qui l'ont fait reconnoistre coupable; & le voyage que le fils & le nepueu de Tertre Barré firent en suite auprès de luy, n'est ce pas vne suite & vne demonstration certaine de ce qu'il est allé faire à saint Malo. Et quand on dit que lors Beaupré ne scauoit pas ce qui estoit dans le testament, cela se peut-il concilier avec ce qu'il reconnoist luy-mesme, que le lendemain il en auoit pris copie du sieur de Guymarcheres pour l'enuoyer à Paris: Et de dire que la copie du testament estoit au Greffe de la Chambre, & le mettoit hors de peril de toute alteration, il ne faut qu'observer les temps pour descouurir l'artifice de cette defense fardée, car le voyage de Beaupré à saint Malo fust au commencement d'Octobre; le voyage du fils & du nepueu de Tertre Barré fust le huitième Octobre; & il est constant que la copie du testament n'a esté mise au Greffe que sur la fin d'Octobre, comme il se reconnoist par vne requeste que le sieur de Launay fut obligé de presenter le quinzième Octobre. Et auparauant ce temps, toutes ces desmarches s'estans faites, peut-on douter du dessein formé de changer le testament; car quelle autre composition particuliere avec des personnes qui y estoient chargées, peut-on douter que ce dessein ayt esté executé, puisque la derniere expedition se trouue dissemblable à la preuue.

Le sieur de Beaupré ne se defend pas mieux de la société qu'il a eue avec Ménauille, & de l'obligation des sept mill liures qu'il luy a passée, qui est la marque de leur intelligence, & le subiet de la denonciation secrette, & le principe de toute cette meschanceté: Et d'alleguer que cette obligation a esté passée par vne personne d'illustre naissance, c'est imiter les mauuais Poëtes, qui font entrer des fausses diuinitez dans leurs fables quand les inuentions leur manquent.

Mais c'est le plus grand aduantage que le sieur de Launay puisse desirer, que Beaupré luy-mesme demeure d'accord, que par la datte de la denonciation faite contre Leuesque, l'on doit reconnoistre si elle a esté faite pour le sortir d'affaires ou auparauant qu'il y fust engagé: Car la fausseté en estant desormais certaine, il est obligé de demeurer d'accord que cette fausseté n'a peu estre faite que pour luy. Et c'est en quoy la Chambre est suppliée de considerer derechef, combien cette fausseté & toutes les autres sont punissables; car regulierement toute sorte de fausseté est vn crime capital, & dans Rome où la teste des Citoyens estoit extremement chere, on n'auoit point douté de la mettre entre les crimes capitaux, comme nous voyons par la Loy *Cornelio de falsis*, & par ce passage commun de saint Cyprian, *Hic testamentum capituli fraude conscriptum*. Et neantmoins il est vray que par nostre vsage on en fait quelque difference, car si vne personne priuée fait vne fausseté dans vn acte particulier, on se contente bien souuent de la venger par l'infamie d'une amende honorable, ou d'une reparation semblable. Et plusieurs ont estimé que

cette indulgence est blasmable, qu'on ne peut assez feuerement punir ces meschancetez hardies, qui tendent des embusches à la fortune des hommes pendant qu'ils reposent en seureté, pendant qu'ils croient auoir euité toute sorte de peril par la prudence de leur conduite: Mais si vn Notaire ou vne autre personne publique, a la hardiesse de faire vn acte faux, il n'y a point de grace ny de remission pour eux, les exemples de Bobie & des autres Notaires qui ont esté pendus pour auoir fait des Contracts faux sont encore tous publics dans Paris, & il ne faut plus attendre de seureté si ceux qui sont depositaires de la foy des hommes & de la fortune des familles se seruent du pouuoir qui leur est commis entre les mains, pour trahir l'assurance des particuliers & la liberté publique, mais que des Iuges entreprennent de faire des faussetez dans vn procez, dans vn procez criminel & d'une accusation capitale, c'est le pire & le plus enorme de tous les crimes, la vie des hommes est si chere, l'honneur si precieux qu'une accusation fausse, vn tesmoignage faux, sont des crimes irremissibles s'ils vont à la vie, voir mesmes quand ils auroient quelque pretexte ou quelque excuse, mais dans la personne de Iuges dont l'office est Sacro-sainct, dont tout l'employ doit estre la protection de l'innocence, la moindre corruption est punissable par la perte de l'honneur & de la charge, la moindre conuiuence à l'oppression d'un innocent est punissable de mort, tesmoin les Iuges de Bragelonne en Châpaigne, qui furent condamnez a mort & à faire amende honorable le Parlement passé, pour auoir negligé la conseruation d'une femme, sur laquelle la colere du peuple s'estoit miserablemēt desbordée. Et quand apres cela l'on assemblera tous les crimes dont les accusez sont coupables; Fausseté dans la premiere information, fausseté dans la seconde, fausseté dans tous les endroits du procez pour faire mourir vn homme innocent & insensé, fausseté dans vn testament supposé, fausseté dans les changemens d'iceluy, fausseté dans plusieurs pieces qu'on a fabriquées pour le faire valoir, pour exercer vn brigandage public, & des concussions infinies & opprimer plusieurs familles innocentes, pour donner l'impunité à vn homme notoirement coupable: si cela n'est punissable du dernier & du plus rigoureux de tous les supplices, il faut dire qu'il est desormais permis d'exercer la piratique, les voleries & les assassinats au milieu de la Iustice, & que la mesme auctorité qui doit proteger les innocens, s'estendra desormais à la puissance de les perdre impunément, car qui sera assez heureux pour descouurir des fourbes preparées par vne si criminelle conspiration, dans laquelle quoy que ce soit assez d'auoir fait mourir vn homme innocent, d'en auoir mis quantité d'autres en peril, il ne faut pas considerer qu'elle en a esté l'issuë, mais quelle en pouuoit estre l'importance, & si Dieu permet bien souuent que ces meschancetes demeurent cachées pour les reseruer à la seuerité de sa dernière Iustice, il ne permet pas qu'on les puisse dissimuler quand elles sont descouuertes, Et des meschancetes si noires qui font horreur à la nature demandent vn exemple qui les satisface & vne expiation publique: Mais il est inutile d'exaggerer cette verité, les accusez l'ont eux mesmes reconnuë, & apres auoir iustifié leur crimes par leur deffence mesme, que reste-il sinon de conclure par ce qu'ils ont aduouë qu'il n'y a point de supplice assez rude pour de si abominables actions.

XXVII.

C'est la seule responce que meritēt ces plaintes importunes des mauuais traitemens supposez, lesquels ayans fait la principale partie des recusations proposées contre Monsieur le Commissaire, ne deuroient plus estre dans leurs bouches, s'ils auoient quelque sorte de respect & de retenuë apres l'Arrest qui en a condamné la supposition.

